



Bosnia and Herzegovina
Federation of Bosnia and Herzegovina

CANTON SARAJEVO
Ministry of Labour, Social Policy,
Displaced Persons and Refugees

Broj:13-05/2-04-31603-54/25
Sarajevo, 12.01.2026. godine

SKUPŠTINA KANTONA SARAJEVO
Služba za skupštinske poslove Kantona Sarajevo
- Ovdje -

VLADA KANTONA SARAJEVO
Stručna služba Vlade Kantona Sarajevo
- Ovdje -

Predmet: Odgovor na zastupničko pitanje zastupnika Selmanović Faruka, *dostavlja se -*

Zastupnik Faruk Selmanović je dana 19.11.2025. godine, a u skladu sa čl. 211. i 214. Poslovnika Skupštine Kantona Sarajevo, postavio pitanje:

“Upućujem zastupničko pitanje Vladi Kantona Sarajevo i Ministarstvu za rad, socijalnu politiku, raseljena lica i izbjeglice Kantona Sarajevo koliko često vršite stručni nadzor nad radom ustanova (javnih i privatnih) u kojima su smještena stara lica, te da li su tim nadzorom obuhvaćene sve ustanove koje djeluju na području Kantona Sarajevo?

Potrebno je da se u odgovoru navede učestalost nadzora, da li su nadzori redovni, vanredni ili po prijavi, da li su obuhvaćene sve registrovane ustanove, uključujući privatne.”

U vezi sa navedenim pitanjem Ministarstvo za rad, socijalnu politiku, raseljena lica i izbjeglice Kantona Sarajevo (u daljem tekstu: Ministarstvo) dostavlja odgovor kako slijedi:

Kantonalne javne ustanove socijalne zaštite osniva Kanton Sarajevo, a osnivački akt donosi Skupština Kantona Sarajevo. Shodno navedenom Kanton Sarajevo je osnovao dvije javne ustanove u kojima se smještaju osobe treće životne dobi i to: Kantonalna javna ustanova „Gerontološki centar“ i Kantonalna javna ustanova „Dom za socijalno zdravstveno zbrinjavanje osoba sa invaliditetom i drugih osoba“. Naime, ustanova u kojoj su smještene starije osobe, a koja je u nadležnosti ovog ministarstva, je Kantonalna javna ustanova „Gerontološki centar“, koja se teoretski i praktično bavi problemima starenja i starosti, te u tom smislu pruža starim, hronično bolesnim, iznemoglim, osobama sa invaliditetom i drugim osobama smještaj, socijalne, zdravstvene i servisne usluge primjenom institucionalnih i vaninstitucionalnih oblika zaštite. Takodjer u nadležnosti ovog ministarstva je i Kantonalna javna ustanova „Dom za socijalno zdravstveno zbrinjavanje osoba sa invaliditetom i drugih osoba“ koja se bavi socijalno - zdravstvenim zbrinjavanjem odraslih tjelesno i mentalno invalidnih osoba sa trajnim smetnjama u fizičkom ili psihičkom razvoju, duševno oboljelih i hronično bolesnih osoba, osoba sa specifičnim oboljenjima, u ustanovi su takodjer smještene osobe treće životne dobi.

Ministarstvo u skladu sa čl. 99., 100. i 101. Zakona o socijalnoj zaštiti, zaštiti civilnih žrtava rata i zaštiti porodice sa djecom (u daljem tekstu: Kantonalni zakon) ("Službene novine Kantona

Sarajevo", br. 38/14 - prečišćen tekst, 38/16, 44/17, 28/18, 52/21, 40/22 i 13/25), kontinuirano vrši nadzor nad stručnim radom ustanova iz nadležnosti Ministarstva. Nadzor u ustanovama se vrši u sjedištu ustanova i putem pismene korespondencije i to kao redovni stručni nadzor i usmjereni nadzor (odnosno, nadzori po potrebi i po prijavi).

U toku 2025. godine Ministarstvo je vršilo redovne nadzore nad stručnim radom Kantonalne javne ustanove "Gerontološki centar" i Kantonalne javne ustanove "Dom za socijalno zdravstveno zbrinjavanje osoba sa invaliditetom i drugih osoba" kao i usmjerene nadzore po potrebi i prijavama.

Predmet redovnog stručnog nadzora je, između ostalog, postupanje vezano za Kantonalni zakon, broj radnika u ustanovi koji su u skladu sa unutrašnjom organizacijom i sistematizacijom radnih mjesta zaposleni u ustanovi i praćenje njihovog broja, način prijema i otpusta korisnika, način vođenja evidencije korisnika smještenih u ustanovi, ostvarivanje prava na džeparac korisnika, stručni rad sa korisnicima.

Ustanove, izuzev Kantonalnog centra za socijalni rad, mogu osnovati domaće i strane fizičke i pravne osobe pod uslovima propisanim zakonom i podzakonskim aktima.

U skladu sa Kantonalnim zakonom, nadležnost kantonalnog ministarstva u oblasti socijalne zaštite, po pitanju privatnih ustanova socijalne zaštite, ograničena je na nadzor koji se odnosi na utvrđivanje ispunjenosti zakonom i pravilnikom propisanih općih i posebnih uslova za osnivanje i rad ustanova socijalne zaštite, koji vrši Komisija.

Nadzor nad zakonitošću rada ustanova, uključujući neposrednu kontrolu, utvrđivanje nepravilnosti i izricanje zakonom predviđenih mjera, provodi se isključivo putem nadležne Kantonalne uprave za inspekcijske poslove, odnosno Inspektorata rada, zaštite na radu, socijalne zaštite i sporta, u postupku i na način propisan posebnim propisima o inspekcijskom nadzoru.

Važeći propisi ne daju ovlaštenje kantonalnom ministarstvu da neposredno vrši stručni nadzor nad stručnim radom, profesionalnim metodama i pojedinačnim stručnim postupanjima zaposlenih u privatnim ustanovama socijalne zaštite, niti da na osnovu takvog nadzora izdaje obavezujuće naloge ili mjere.

S poštovanjem,



End  ić

Dostaviti:

1. Naslovu (2x);
2. Koordinatoru odgovora na zastupnička pitanja i inicijative;
3. U spis;
4. a/a.